

## **Dieta annuala dal Forum economic mundial WEF 2022 – Infurmaziuns impurtantas**

Las autoritads da la Confederaziun, dal chantun Grischun e da la vischnanca da Tavau infurmeschan en moda cuntinuanta ed objectiva davart lur tenuta envers la Dieta annuala dal Forum economic mundial WEF 2022 a Tavau. Las suandantas explicaziuns davart la Dieta annuala dal WEF derivan da las differentas autoritads e dals differents posts involvids.

## **Dieta annuala dal Forum economic mundial WEF 2022 a Tavau**

### **1. Infurmaziuns generalas**

A la Dieta annuala dal Forum economic mundial a Tavau dals 22 fin ils 26 da matg 2022 vegni fatg quint cun passa 2500 participantas e participants da l'economia, da la politica, da la scienza e da la cultura. Circa 400 collavuraturas e collavuraturus da medias naziunalas ed estras rapportan sur da l'eveniment a Tavau.

Dapli infurmaziuns davart il motto e davart il program da la Dieta annuala dal WEF 2022 sin <https://www.weforum.org/events/world-economic-forum-annual-meeting-2022>

## **2. Significaziun**

La Dieta annuala dal Forum economic mundial è ina da las occurrenzas da la politica economica e sociala las pli impurtantas dal mund. A chaschun da la 50. Dieta annuala il schaner 2020 a Tavau han il Cussegl federal, la Regenza dal chantun Grischun e la suprastanza da la vischnanca da Tavau punctuà explicitamain la valur da questa occurrenza per la Svizra. Tenor lur avis èsi fitg positiv da dar alloschi a quest forum, nua ch'i vegnan barattadas opiniuns e tschertgadas soluziuns, e da cuntinuar uschia cun la lunga tradiziun da la Svizra sco pajais ospitant per conferenzas e per scuntradas internaziunalas.

La radunanza annuala da las represchentantas e dals represchentants da l'economia, da la politica, da la scienza e da la cultura a Tavau porscha la pussaivladad da tgirar en Svizra en in rom spezial il contact cun bleras personalitads d'autas posiziuns. En la vischnanca da Tavau sa basan numerusas plazzas da lavur sin ils effects da congress e d'autras occurrenzas per l'economia publica e quellas e quels da Tavau èn s'exprimids repetidamain en differentas votaziuns dal pievel en moda positiva envers il WEF ed envers lur rolla d'ospitant.

### 3. Custs e niz

Ilis custs supplementars per la segirezza da la Dieta annuala dal WEF 2022 importan previsiblmain tut en tut circa 9 milliuns francs.

Sco gia durant ils onns precedents sa participescha la Confederaziun ensemen cun la Fundaziun WEF e cun ses ulteriurs partenaris (chantun Grischun, vischnanca da Tavau) – en il rom d'in model da finanziaziun da trais stgalims – als custs per las mesiras da segirezza da las Dietas annualas dal WEF 2022–2024. La Fundaziun WEF ha concludì d'auzar sia contribuziun a la finanziaziun, uschia che la participaziun da la Confederaziun sa reducescha da 3/8 a 2/8. Perquai surpiglia ussa la Fundaziun WEF e betg pli la Confederaziun la part la pli gronda dals custs. Ilis partenaris da finanziaziun surpiglian las suandantas parts da quests custs: WEF 3/8, chantun Grischun 2/8, vischnanca da Tavau 1/8, Confederaziun 2/8. A la contribuziun da la vischnanca da Tavau sa participescha la vischnanca da Claustra cun 100 000 francs.

Ilis detagls concernent la finanziaziun èn reglads en la «Missiva tar il Conclufederal davart l'engaschament da l'armada en servetsch d'assistenza per sustegnair il chantun Grischun tar las mesiras da segirezza e tar il Conclufederal davart la participaziun da la Confederaziun a la finanziaziun da las mesiras da segirezza en il rom da las Dietas annualas dal Forum economic mundial 2022–2024 a Tavau» (Fegl uffizial federal 2021 435).

Il model da trais stgalims per finanziair ilis custs da segirezza vegn applitgà da princip dapi l'onn 2004:

#### Stgalim 1

La limita da custs per las expensas da segirezza importa 9 milliuns francs per onn. Ilis partenaris surpiglian las suandantas parts da quests custs:

Partenaris	Import en francs	Part
WEF	3,375 miu.	3/8
Confederaziun	2,25 miu.	2/8
Chantun Grischun	2,25 miu.	2/8
Vischnanca da Tavau	1,125 miu.	1/8
Limita da custs	9 miu.	

#### Stgalim 2

Sche la limita da custs vegn surpassada per motivs speziels, vegn applitgà il stgalim da finanziaziun 2. In surpassament da la limita da custs po per exempel resultar per ilis suandants motivs:

- in dumber extraordinariamain grond da persunas protegidas tenor il dretg internaziunal sa participescha a curta vista a la Dieta annuala dal WEF
- adattaziuns pli grondas a curta vista vi dal concept da dieta dal WEF

- augment signifitgant dals custs d'alloschi per il persunal da segirezza extrachantunal
- extensiun da la zona da segirezza a Tavau pervia dal dumber da personas da proteger
- custs supplementars pervia da l'aura.

En in tal cas metta la Confederaziun a disposiziun – per tut las trais Dietas annualas dal WEF da la perioda 2022–2024 – meds finansials supplementars da tut en tut maximalmain 900 000 francs per ils custs da segirezza che surpassan la limita da custs da 9 milliuns francs per Dieta annuala dal WEF. Expensas dal stgalim 2 che surpassan questa summa vegnan repartidas tenor la clav da repartiziun dal stgalim 1, nun ch'il stgalim 3 vegnia applitgà.

### Stgalim 3

En cas d'eveniments extraordinaris (p.ex. attatgas terroristicas, attentats, smanatschas massivas u indizis concrets da commetter acts da violenza) surpiglia la Confederaziun 80 pertschient dals custs da segirezza che surpassan ils stgalims 1 e 2. Ils 20 pertschient restants vegnan surpigliads dal chantun Grischun, da la vischnanca da Tavau e dal WEF.

\*\*\*

L'engaschament da l'armada en il servetsch d'assistenza vegn finanzià sur il preventiv ordinari dal Departament federal da defensiun, protecziun da la populaziun e sport. Per l'engaschament da l'armada a favur dal WEF poi vegnir fatg quint tut en tut circa cun ils custs che resultassan, sche las units participadas prestassan lur curs da repetiziun regulars. Il preventiv annual per las acziuns da l'armada a chaschun da la Dieta annuala dal WEF 2022–2024 importa 32 milliuns francs. Ils custs per las acziuns da l'armada al WEF 2019 (29,65 miu. fr.) ed al WEF 2020 (29,74 miu. fr.) èn stads levamain sut quest preventiv.

Il Forum economic mundial è ina fundaziun. L'onn da finanzas dal fanadur 2020 fin il zercladur 2021 ha el fatg ina svieuta da 315 milliuns francs e cuntanschì in surpli da 531 000 milliuns francs che vegn attribuì al chapital da fundaziun.

La svieuta che vegn generada tras la Dieta annuala dal WEF en l'entira Svizra, è vegnida stimada tenor in studi da l'Universitad da Son Gagl per l'onn 2017 a circa 94 milliuns francs. Da quels èn circa 60 milliuns francs vegnids generads a Tavau.

## 4. Segirezza

A la Dieta annuala dal WEF a Tavau collavuran differents servetschs da la Confederaziun, dal chantun, da la vischnanca da Tavau e dal WEF. La coordinaziun è chausa da la giunta dal WEF da la Regenza grischuna ([www.wef.gr.ch](http://www.wef.gr.ch)) sut la direcziun dal president da la Regenza Marcus Caduff. La Polizia chantunala dal Grischun sco er ses partenaris procuran per la segirezza da las visitadras e dals visitaders da la Dieta annuala dal WEF, da la populaziun indigena e dals giasts.

Durant la Dieta annuala dal WEF a Tavau è la Polizia chantunala dal Grischun responsabla per in dispositiv che resguarda smanatschas per la segirezza. Questas smanatschas han consequenzas er ordaifer ils cunfins chantunals. Quai na sa mida er betg durant la Dieta annuala 2022. L'analisa da la situaziun da segirezza per las proximas Dietas annualas dal WEF ha mussà, ch'in vast dispositiv da segirezza è indispensabel, per che la Svizra possia ademplir sias obligaziuns da protecziun dal dretg internaziunal.

Per mantegnair la segirezza e per proteger persunas ed objects sa participeschan tut ils chantuns da la Svizra en il rom d'ina acziun interchantunala da la polizia. Las chombras federalas han plinavant permess acziuns da segirezza subsidiaras a favur dal chantun Grischun cun maximalmain 5000 appartegnentas ed appartegnents da l'armada per ils onns 2022–2024 ([www.armee.ch/wef](http://www.armee.ch/wef)).

En dus secturs da segirezza è responsabla la Confederaziun:

- Per la segirezza da las persunas da l'exteriur ch'èn protegidas tenor il dretg internaziunal – sco scheffas u schefs da stadis, scheffas u schefs da regenzas e commembras e commembers da regenzas en uffizi – ordinescha il Servetsch federal da segirezza sche necessari mesiras da protecziun spezialas. Sco il dispositiv da segirezza general vegnan quellas garantidas da la Polizia chantunala dal Grischun e da ses partenaris.
- Per segirar il spazi d'aria e per mantegnair la suveranità aviatica ha il Cussegl federal relaschà restricziuns per il spazi d'aria sur Tavau. Sut tschertas cundiziuns dastga il traffic aviatic civil traversar er vinavant il spazi d'aria restrenschi, sch'el è annunzià ordavant ed identifitgà. Responsabla per la permissiun è l'Aviatica militar. En cas da basegn vegnan mesiras da la polizia aviatica ordinadas e realisadas tenor las reglas e proceduras internaziunalas. Ultra da quai sto er vegnir reglà durant la Dieta annuala dal WEF il traffic aviatic da helicopters per Tavau. Pertutgads da restricziuns èn er parasguladers, dronas, eroplans da model e.u.v. (guardar <https://www.bazl.admin.ch/wef> sco er [www.wef.gr.ch](http://www.wef.gr.ch) sut la rubrica FAQ).

## **5. Libertad d'opiniun e libertad da demonstrar**

Las autoritads da la Confederaziun e dal chantun Grischun considereschan il Forum economic mundial sco lieu dal dialog avert. En il rom da la Dieta annuala dal WEF duai er esser pussaivel da discutir dumondas criticas davart la globalisaziun e davart il svilup da l'economia mundiala. Las autoritads spetgan dentant che las criticas ed ils critichers preschentian lur quitads, lur arguments e lur propostas en moda paschaivla.

Las autoritads grischunas èn da princip prontas da permetter er l'onn 2022 ina demonstraziun sin dumonda. Quai sut la premissa che las cundiziuns necessarias per la protecziun dals umans, da l'infrastructura e dals edifizis vegnian resguardadas.

Per realisar ina demonstraziun ston ils organisaturs far cunvegrientschas detagliadas cun las autoritads. En quest connex ston vegnir resguardads ils basegns da la populaziun indigena, dals giasts da vacanzas e dals giasts dal di sco er dal traffic. In'eventuala dumonda da demonstraziun sto perquai vegnir inoltrada uschè baud sco pussaivel (guardar [www.wef.gr.ch](http://www.wef.gr.ch) sut la rubrica FAQ).

Sch'igl avess da dar ina demonstraziun betg permessa, prendessan las autoritads – en il rom dal princip da proporziunalitad – las mesiras necessarias per garantir la segirezza e la libertad da sa mover da las personas indigenas e dals giasts. Personas che commettan malfatgs vegnan persequitadas consequentamain.

La limita da toleranza da la polizia suonda la pratica ch'è sa cumprovada ils ultims onns: En cas da violaziuns da leschas vegni intervegnì adequatamain per uschia metter clers segns cunter la violenza. La strategia cumprovada da trais stgalims (dialog, deescalaziun, intervenziun) duai perquai vegnir applitgada er en l'avegnir en il rom da la proporziunalitad.

Per infurmar las medias e la populaziun en moda averta e cumplessiva davart tut ils aspects da dietas annualas futuras dal WEF a Tavau mainan las autoritads grischunas, en collavuraziun cun la Confederaziun e cun la vischnanca da Tavau, in center da medias extern e tgiran la pagina d'internet [www.wef.gr.ch](http://www.wef.gr.ch).

## **6. Consequenzas per il turissem**

Il turissem en la regiun Tavau / Partenz n'è durant tut il WEF da princip betg restrenschi. I na dat naginas restricziuns da viagiare generalas. Tavau è cuntanschibel cun il traffic public u cun il vehichel privat.

Sin tut las vias d'access per Tavau datti controllas preventivas da personas, da vehichels e da bagascha. En emprima lingia sa tracti d'evitar che objects privlus vegnian manads a Tavau. Las controllas vegnan fatgas per proteger las participantas ed ils participants dal congress, la populaziun sco er ils giasts. Las autoritads grischunas garanteschon che las controllas sin las vias d'access per Tavau han lieu per tut las personas pertutgadas senza schicanas ed en moda speditiva. Tuttina na poi betg vegnir exclus ch'i po dar temps da spetga.

Infurmaziuns supplementaras davart la situaziun actuala da traffic e da viadi stattan a disposiziun sin [www.graubuenden.ch](http://www.graubuenden.ch) resp. sin [www.rhb.ch](http://www.rhb.ch), sin [strassen.gr.ch](http://strassen.gr.ch) e sin [www.sbb.ch/fahrplan/bahnverkehrsinformation.html](http://www.sbb.ch/fahrplan/bahnverkehrsinformation.html).

Entaifer la vischnanca da Tavau datti territoris cun restricziuns d'access durant la Dieta annuala dal WEF. Quai èn las zonas da protecziun tar il Center da congress / hotel Kongress / hotel Hilton Garden Inn, tar ils hotels «Seehof», «Intercontinental» ed «AlpenGold Hotel», tar la piazza d'atterrar per helicopters «Seewiese», tar il stadion da glatsch sco er sin parts da la piazza da parcar dal Parsenn (guardar [www.wef.gr.ch](http://www.wef.gr.ch) sut la rubrica FAQ). Las personas che abitan en questas zonas da protecziun survegnan in passaport persunal ed ina vignetta per lur vehichel (hotline da la Polizia chantunala grischuna: +41 81 257 58 15). Tut ils auters hotels e tut las autras fatschentas èn cuntanschibels senza restricziuns.